

۱ ایلول

۱۳۴۱

تورک تاریخ انجمنی

اون بشنجی سنه
نومرو ۱۱ (۸۸)

مجموعه سی

معروضات

(اونجی صایدن مابعد)

بوراده همان بر قشله بناسسنه و حاجیلر وتیک واکباز ناحیهلری برلشدیربلهرك مجدداً تشکیل اولنان قضا مرکزی اولق اوزره قیشله یاننده برقاچ یوز خانکک بر قصبه انشاسنه باشلاندى و بورایه ابتدا خاصه طابورلری آباق باصمش اولدیغندن خاصه قضاسی تسمیه اولندی . ونواحی ءثلثه نك مقدار نفوسنه کوره هر برینک حصه سنه اصابت ایله جک قدرخانلر تفریق و تنزیل ایله قصبه ده اوچ محله تشکیل اولتمی ایچون لازم کلنلره امر ویرلدى .

خاصه قصبه سنک موقعی مرعشه اون بش وییلانه اون ایکی ساعت اولوب بیلان ایله اسکندرون آره سی ده اوچ ساعتک مسافه اولغله خاصه قصبه سی اسکندرونن مرعشه کیدن جاده اوزرنده و تام یاری یولده واقعدر .

خاصه قضاسنک هر قریه سنده اصولی وجهه مختارلر انتخاب ایتدیرلدى . و اوچ ناحیه نك ایله و کلنلرنن برر وارمنی طائفه سنندن برکه جمعاً درت اعضادن مرکب بر قضا مجلسی تشکیل و مقدار کفایه عساکر ضبطیه ترتیب و قضا مدیری تعیین اولندی و بر نایب کوندرلسی ایچون در سعاده انها قیلندی . و کمال سرعت ایله اوچ ناحیه نك نفوسى تحریر اولنه رق اسنان اربابی بالتفریق پدر و ساثر اقربالرله برابر حزیرانک اوائلنده اردوکاهه کتوریلوب قرعه لری چکلدى . فقط حاجیلر ناحیه سنک ذروه جبلده متوطن اولان قره فقیلی عشیرتی مناعت موقعه لرینه کونکهرک قرعه دعوتنه اجابت ایلیوب باشو بکده اظهار عجز ایتدیکندن میرالای ابراهیم بک قومانده سیله کیجه لین سوق اولنان بر قاچ طابور پیاده عساکر شاهانه قره فقیلی عشیرتنک ساکن اولدق لری ذروه جبله چیقوب بوراسی اردوکاهه سکز ساعتک مسافه اولدینی حالد علی الصباح بفته عشیرت مرقومه یی باصهرق اکثرینی اخذ ایله اردوکاهه کتوردکلرنده هنوز اخشام اولماشیدی و الیه ایدیلن اسنان عسکره لری

تفریق ایله قرعه به ادخال اولمشلر ایدی. فرقه اصلاحیه ایکی آتش آره سنده ایکن بووقه کرد طاغنک اله کچمنسه وکلیس یولنک آچلمسنه بادی اولمشدر .

شویله که بووقه نواحی سائرہ خلقنه دهشت ویرمش ایلدیغندن دلی خلیل ارتق کردطاغنده طورهمیوب کاورطاغنک جانب شرقیسنده واقع کرکوتلی ناحیه سنک ایچروسنده اولاشلی طاغری ارسنه صوقلمش فوق العاده مناعت ایله معروف اولان قیا باشی قریه سنه کچمشدر .

بونک اوزرینه ذاتادلی خلیلک اوضاع نابجا و اطوار خودسرانه سندن دلگیر اولان کرد طاعنی اغاری اردوکاهه کلوب کیتمکه باشلادیلر بوضورتله کرد طاعنی اله کچهرک کلیس اوزرندن حلبه کیدیلوب کلنور اولدی .

ریحانیه اتولوری خط رجعتیزی محافظه ایدرک اسکندرون ایسکله سندن هرکون لوازمتمز کلمکده اولدینی حالده بوججه کلیس طریق دخی آچیلنجه حلبدن هرشی جلب ایدیور اولدی . و کرد طاعنی اغاری ویرکو بقایالربنه محسوب اولوق اوزره پیدرپی فرقه اصلاحیه ذخیره و حیوانات کتورمه و حلب و عینتاب وکلیس تجاری کلوب کیتمکه باشلادیلر . الحاصل صاغ طرفیز آچلیدی . مشغولیتمز کاور طاغنه منحصر قالدی .

کرد طاغنده عزیه نامیله بر قضا تشکیل اولندی واوراده اصلا خرسیتان اولندیغندن مجلس اعضاری هپ کرد اغالزندن انتخاب قیلندی .

کرد طاعنی اغاری برر عشرت کتخدالری اولوب مجلس اعضالنی کبی برر مأموریتله قایلغله حالزندن خوشنود اوله رق دلی خلیلک حکم خودسرانه سی التندن چیقوب احکام قانونیه به تابع بر قضا مدیرینک معیت ورفاقتنه کیرمکدن متنفر اولمیوب دولته حسن خدمت ایله جکلری سیاق حالزندن آکلاشلمشیدی .

حاجیلر وتیک واکباز ناحیه لری بکلرینه کلنجه بونلر اوتهدنبرو برر دره بکی اولوب ناحیه لرنده حکمدار مستقل کبی خودسرانه حکومته و واردات محلیه پی دیلدکلری کبی قبض و صرفه آلممشلر ایدی . شویله که ناحیه لرینک ویرکولرینی تحصیل ایدوب اونده برینی صانکه دولته مطیع اولدقلرینی اثبات ایچون مرعش مال صندوقه ارسال ایله باقیسنی امور ذاتیه نرینه صرف ایدرلردی . و اوچ ناحیه دن سنوی ایکویز اللی غروش بدل عشر ویرلردی . حالبوکه کچن سنه محمد بک مرعش

متصرفانگی طرفندن مدیر نصب اولنوب تیک واکباز حصہ سی اولہرق بشیوز غرضش عدد اغنام رسمی تحصیل اولمش ایسہدہ پاشو بک اکا اطاعت ایلدبکنندن حاجیلر ناحیہ سی حصہ سی تحصیل اولنہ مامشیدی . بو اوج ناحیہ ننت اعشار ورسومی ایسہ برکلی مبلغ اولہجفی بالمعاینہ معلوم اولشددر .

بویلہ حکومت خودسرانہیہ الشمش اولان بکلرک قضا مدیرلرینہ انقیاد ایلیری کندولرینہ پک کوچ کلہ جکندن وکندولری هضم ایسہ بیلہ انلرہ منسوب د متخصص اولنلر کندولرینی راحت براقیہ حقلمری درکار اولدبغندن کندولرینک آخر محلہ نقل خانہ ایتدیرلملری لازم کلہجکی مرسل زادہ واسطہ سیلہ پاشو بکہ افادہ و تفہیم اولندقدہ اودہ بوکا حق ویرمش و محمد بک بروجلہ کندو نہ ترجیح اولنماق وانک حقندہ نہ معاملہ اولنورسہ کندی حقندہ دخی عینا اجرا اولنلق شرطیلہ ہر نہ امر ایدیور ونہ طرفہ کوندیریور ایسہ راضی اولہجنتی بیان ایتشیدی . بناء علیہ محمد بک ایلہ پاشو بکہ قید حیات شرطیلہ شہریہ ایکشر بیک غروش معاش ذاتی تخصیص و محمد بک روم قلعہ قضاسی مدیر لکنہ و پاشو بک البستان قضاسی مدیر لکنہ تعیین ایلہ کندولرینہ رتبہ دخی ویریلہجکی وعد اولندی .

دیگر نواحیء ثلاثہ بکلرینہ دخی مناسب مقدار معاش ذاتیلر تخصیص قیلندی . بووجلہ معاش ذاتی تخصیصی مآذونیت عیدانہ من داخلندہ اولغلہ اصحابنہ سند موقت اوللق اوزرہ بیورلدیلر ویریلور و بو بیورلدیلر قولریلہ درویش پاشا طرفندن مشترکاتمہر ایدیور و متعاقب در سعادتدن براتلری کلوب صاحبلرینہ اعطا ایدیور ایدی . محمد بک ایسہ موسوس بر آدم اولدیغندن روم قلعہ یہ عزیمت ایلسنہ انتظار اولنور ایکن کیجہ لین برادرینی و اولاد و عیالی آلوب تیکک اوست طرفندہ اولان قبولی دربندینہ چیقہرق اولاشلی اغالریلہ مخبرہ یہ باشلامش و نیک اہالیسنہ دخی بر لکدہ حرکت ایلرینی تکلیف ایلش ایسہدہ کندو اتباعیلہ براز شقاوت پیشہ لردن بشقہ کیسہ کندوسنہ پیرو اولمامشیدی . متعاقباً اظہار ندامت ایلنرک اردوکاہہ کلوب دخالت ایلدی . دخالتی قبول اولندی لکن کندوسنہ آرتق رتبہ و مأموریت ویریلہ میجکی افادہ اولندقدہ انطاکیہدہ اقامتہ رخصت ایستمکہ شہریہ بیک غروش معاش تخصیص اولنہرق انطاکیہ کوندردلی .

پاشو بك بووجهله خضمنه غلبه دن ممنون اوله رق دبده سسيه البستانه كيدوب
اجراى حكومه ياشلامش وقپوجى باشلىق رؤسى دخى درسعادتن كلهرك كندوسنه
كوندرلمش واوده صدق واستقامت ايله خدمت ايله رك مؤخرا كندوسنه ميرالامرق
رتبه سى دخى و يرلمش در .

بوئانده فرقه اصلاحيه اطنه دن يوز اللى و طرسوسدن يوز كه جمعا ايكيوز
اللى باركبر خدمت مفتخره اولمق اوزره كلشدر. و حلبدن برمقدار ضبطيه ايستلمش
ايدو كندن بر سوارى ضبطيه يوز باشسيه برمقدار ضبطيه كوندرلمشيدى. بو يوز باشى
محمد چاوش ديو معروف اولان بر كرك باران ديده و هر طرفك اسوالته وقوفلى و تمام
بزم ارادىغمز ادم اولوب طوغرلىسى فرقه اصلاحيه نك چوقايتنه يارامشدر. حلب
وجوهندن و معلومات محليه اعجابندن بر ذاتك دخى فرقه معيتمده بولمىسى تنسيب
ايله حلب واليسنه اشعار اولمش ايدو كندن حلب ايلالى مجلس كبرى اعضاسندن
ويلى افندى كوندر يلوب نواچيدن ذخيره و ادم جلبى كى ايشلرده بو داندن دخى
چوقا استفاده اولمشدر .

فرقه اصلاحيه مفرزه سى قوماندان اولان ميرلوا قورت اسماعيل پاشا قوزان
شرقى جوارنده واقع مغاره ناحيه سته كلشمىدى بوجه بالا اسكندرون دن او طرفه
كوندرلمش اولان حسين حسنى افندى دخى قوزان اچندن مرور ايله اسماعيل پاشا
زدينه كيدوب كلوركن قوزان شرقي اغاسى يوسف آغايه مسافر اولوب بر مدت
آنك ياننده قاهره اول حوالى اهاليسنك احوالته كسب وقوف ايتمش اولديغى حالده
يوسف آغا طرفندن كندوسنه ترفيق اولنان خليل افندى نامنده بريله حيقه كلدى.
خليل افندى يه اكرام اولنه رق اعاده اولدى . بو كره قوزان غرهبى اغاسى احمد آغا
(جالا طرابلس غرهبه بوئان احمد پاشا) طرفندن دخى حافظ على افندى نامنده
برى كلوب كيتدى .

بو تحقيقا تندن حاصل اولان معلوماتك خلاصه سى بو ايدى كه قوزان اهالىسى متدين
واهل عرض آدمير اولوب اورايه واردىغمزده وقوعى ملحوظ اولان محاربه قوزان
اوغللرى حكومتيله اوله حق بو ايسه اساسى بر حكومت متغلبانه اولديغندن هدم
اولنديغى كى اهالى حكومت سنه نك قوجاغنه دوشو و بره جك اما كاور طاغنده
قريب الظهور اولان محاربه لر مزه هب حيايد و قطاع طريق وغيرت دينه دن عارى

اشقیای اہالی ایلہ اولہ جق . افراد اہالی ایلہ حرب ایسہ تقدیر مشکل اولدینی بیاندن مستغیدر و بلطفہ تعالی کاور طانغی اشقیاسی تدمیر اولدینی حالہ قوزانک اصلاحی اسہل اولہ جنی اکلشیلدی . و اولوقته قدر قوزان اہالیسنک قولاقلری طولدی رملق و اصلاحاتہ حاضر لائق اہم اولغہ بوکا دائر اولان اسبابہ تشبث ایدلدی .

اوتہ دنبرو قائم مقام ایلہ میرالایرہ بک و بیکباشیلرہ اغا و فقط مکتبیدن چیقانلرینہ افندی دنیلوردی . بوکرہ با ارادہ سنیہ فیالبعید ارکان حرب بیکباشیلرینہ دخی بک دنیلیمک امر اولغہ ارکان حرب بیکباشیلرندن اولان سریاور چاکری سالف الذکر حسین حسنی افندی یہ دخی اندن صکرہ بک دنیلیمشدر .

خاصہ و عزیزہ قضاری بروجہ بالا تنظیم اولندقدن صکرہ کاور طاغنک جانب شرفیسندہ بولنان و کنار ناحیہلری دنیلن کرد ناحیہلرینک اصلاح احوالہ تشبث قیلنمشدر .

شوہلہ کہ اکباز ناحیہسنہ متصل اولان کرکوتلی ناحیہسی اہالیسی صورت اطاعتدہ بولنمشار ایسہدہ دلی خلیل بروجہ بالا بوناچیہنک ایچروسندہ و اولاشلی طاغلرینک اتصالنہ واقع قیاباشی نام قریہیہ التجا ایتمش اولدیغندن بوقریہ اہالیسی علنا حال عصیانہ ایدیلر .

کرکوتلی ناحیہسنک اتصالنہ بولنوب اولاشلی طاغلرینک ایچنہ کیرمش اولان چرچیلی ناحیہسی ایسہ اشقیای اوجانغی اولوب بورایہ اطرافدن کلوب تجمع ایتمش حیادید و اشقیانک مقداری یولوردن زیادہ ایدی و چرچیلی اہالیسی اکیئلرینی طوپلایوب و چواللرینہ طولدیروبده اولاشلی طاغلرینہ چیمق نینندہ اولدقلری تفرس اولندی حالبوکہ چرچیلی ایلہ کردطانغی ارہسندہ دومدوم اوہسی دیومعروف اولان پک واسع بر اوہ دلیکانلی عشیرتنک قیشلہ یری اولوب بوسنہ عشیرتلر یایلاہہ کیتمکدن منع اولغہ دلیکانلی عشیرتی بورادہ خیمہ نشین ایدی و سکز اویمانغہ منقسم بریبوک عشیرت اولدینی حالہ ذخیرہیہ محتاج ایدی و بونلرک چرچیلی پیشکاھندہ و مرعش جادہسی اوزرنده واقع نیغولی قلعهسی جوارندہ اسکانلری متصور اولغہ چرچیلی اکیئلرینک دلیکانلی عشیرتنہ قالدردلسی ایجاب حالہ موافق کورلمش ایدوکندن چرچیلی اوزرینہ اوج بلوک سواری و اوج طابور پیادہ عساکر نظامیہ سوق و نلوب مرسل زادہ مصطفی بک دخی آنلرہ مقدمہ الجیش اولق اوزرہ بر مقدار

ریحانیه اتلوسیه انلره ترفیق اولمشیدی. مصطفی بك نیغولی قلعه سنه وارنجه چرچیلی اشقیاسی چیقوب انی احاطه ایتمشله ایسه ده عسا کر شاهانه یتشوب اشقیایی پریشان و ایچلرندن بعضیلرینی اسیر ایتمشلردر. ایشته بوسره ده دلیکانلیلر چرچیلینک اکیئلرینی طوپلایوب خیمه باهلرینه عودت ایتمشلردر .

بعده صفرك اون یشنجی جمعه ایرتسی کونی فرقهٔ اصلاحیه ایله تیک پیشکاهدن حرکت ایله اوچ ساعت ایلروسنده واقع کر کوتلی ناحیه سی پیشکاهنه مواصلت ولندی. کر کوتلی کوردلری هر نقدر صوره اطاعتده ایسه لرده وحشی آدمرا اولدقلرندن طاغله فرار ایتمشله ایدی . لکن بوجه بالا چرچیلی به کیدرکن ریحانیه اتلوسی رکردک تارلاسنی چکنه مش و اکیئلرینی اتلرینه یدرمش اولدقلرندن ساحی برتقریبه فرقهٔ اصلاحیه به کلوب اشکا ایتمکله مصطفی بکدن سؤال اولندقدن نصلسه اتلولر و تارلایه اوغرا یوب چکنه مش اولدقلرندن انلرده اکیئلری حیوانلرینه یدرمش اولدقلرینی اعتراف ایتمکله اکیئلری کشف و مصطفی بکه تضمین ایتدی لرلی .

اول حوالی اهلایی بویه بر اثر عدالت کورمه مش اولدقلرندن طاغله فرار بتمش اولان وحشی کردلر همان یرو یرینه اینه رک پیدرپی اردوکاهه کلوب کیتمه سربستجه ما کولات و ساثره کتوروب صاتمغه باشلامشله و متغلبه دن اولان اغلردن بکلردن نفرت ایله رک جانب حکومته میل و محبت ایتمشلردر .

برکیجه کر کوتلی پیشکاهنده یتوتت اولندقدن صکره فرداسی چرچیلی ناحیه سی پیشکاهنه واریلوب نیغولی قلعه سی جوارنده نصب خیام اقامت اولندی . نیغولی قلعه سی مرعشدن عمیق اومه سنه و چقورا وودن عزیزه و کلیس و عینتاب و حلب طرفلرینه یدن یوللرک تقاطع نقطه سنده واقع اوله رق بوحوالینک کلیدی مثابه سنده بر موقع هم اولغله همان قیشله اولمق اوزره بوقله نك تعمیرینه و کر کوتلی جهتنده واقع لمه یه ناظر اولان و چرچیلی بوغازنده بولنان تپه لره برر قلعه انشاسنه و برطرفدن خی کر کوتلی ناحیه سنک تحریر نفوسنه باشلاندى .

نیغولی قلعه سی تعمیر اولنورکن دیوارلرنده ایکی نوع طاش بولندی بری اصل نانک طاشلری که پک عتیق اولدیغندن اشوب سونکر کبی دلیک دشیک اولمشیدی یگری صکره وقوع بولان تعمیرنده علاوه اولنان طاشلرکه اولکی طاشلره نسبتبه کی اولدقلری لدی المعاینه معلوم اولدی . ایشته بویکی طاشلردن برینک اوزرنده

لسان یونانی اوزرہ محکوک ایک سطر بولندی بر سطرینک بعض محللری بوزوق اولدیغندن اوقونہمدی . دیگر محللری اوقونوب ترکیه ترجمہسی (اسکندر بورادہ جزا قانونی تأسیس ایتدی) دیمک اولدینی جہتلہ بوقلعه پک عتیق بر شی اولوب مرور زمان ایله خراب اولغله اسکندرک انی تعمیر ایتیش اولدینی اکلشادی .

تاریحجه معلومدرکه اسکندر ابتدا ایاس ایله پیاس ارسندہ دارا ایله حرب ایدوب دارا بوزلدقندن صکرہ اسکندرون طریقہ بیلانہ چیقوب بوغازلری طومتش ایسده تکرار بورادہ دخی بوزلدقندن صکرہ ارتق ایرانیلر اورالردہ طورامیوب بابله طوغمری فرار ایتشدر ایشته اولوقت اسکندر عمیق اوسسنہ اینوب بابله عزیزتندہ بوقلعهی تعمیر ایتیش اولسی وارد خاطر اولور بعدہ خراب اولغله بوکرہ بز دخی انی تعمیر ایله قیشله اتخاڈ ایتدک واول طاشی ده اورادہ حفظ ایتدردک .

روجه بالا نیغولی قلعہسنک تعمیرینہ ایتدار ایله برابر کاور طاغنک جانب شرقیسندہ بولنان کرد ناحیہلری وکرد طاغنک مرعشہ مضاف اولان کفردیز ناحیہسی وودوموم اوسندہ متعدد قریہلر تشکیل ایدن دلیکانلی وچلیکانلی عشرتلی برلشدیریلرک بر بیوک قضا تشکیل واصلاحیہ تسمیہ اولندی . وبوقضایہ مرکز اولق اوزرہ نیغولی قلعہسی جوازندہ بر قصبہ انشاسنہ و حکومت قوناغی بناسنہ باشلانندی . دلیکانلی وچلیکانلی اغالرندن بعضیلری بررمقدار خانہلریله اشبواصلاحیہ قصبہسندہ اسکان قیلندی وبورادہ بر مجلس تشکیل اولنوب اعضالغنه دلیکانلی بوی بکیسی حسین اغا وچلیکانلی عشرتی وکفردیز ناحیہسی اغالرندن برر ذات تعیین اولندی . واصلاحیہ مرکز و مرعش متصرفلغنه مربوط اولق اوزرہ خاصہ وعزیه وبولانیق قضالری بورایہ الحاق ایله بر سنجاق قائممقاملغی تشکیل و مرعش طرفہ گلش اولان مهاجرین ایچندہ قبار طای علماسندن جعفر افندی نامندہ بر ذات بولغله شہریہ بشیوز غروش معاش ایله اصلاحیہ مفیلکنہ تعیین اولندی وپیاس سنجاغی قائممقامی شوقی افندی اصلاحیہ سنجاغی قائممقاملغنه نقل ایله پیاس قائممقاملغنه دخی حلب مجلس کیری اعضاسندن اولوب فرقه اصلاحیہ معیندہ بولنان ویسی افندی مأمور ایدلدی .

خاصہدہ ایکن اکباز بکلری اردوکاهہ کلوب کتیدیلر فقط ریسلری و الہ اختیارلری اولان احمد بک گلہمش ایدی . چونکہ کندوسی ساکن بر ادم اولغله

ایشی کندوسنک برادر زاده سی و شریک نفوذی اولان علی بك الله كچمشیدی .
 بناء عليه علی بك دیگر بکلرله برابر کلوب کورشمش ایدی . و احمد بك ضررسز
 بر آدم اولدیغنان آرقه سنه دوشلمدی و علی بکه بشوز غروش معاش ذاتی تخصیص
 ایله موقتا فرقه اصلاحیه معینده الیقو نلشیدی . بوکره اصلاحیه ده ایکن احمد بك
 حیقاً کندی . سبب تاخیری سؤال اولدوقده دیدی که (بوحوالیدن چوق اردولر
 کلوب کچدی بو اردوده کلوب کچر . بن کندی حاملده بر آدم شخصصحه موجب
 مسئولیت اوله حق برایشده بولندم اردوده نه ایشم وار دیدم . صکره کوردم که نیغولی
 قلعه سی تعبه باشادیکیز . اکلادم که بو ایش اساسلیدر . زیرا بوحوالینک کلیدی
 بوراسیدر . بز بوحوالینک بیوکلریدن بولنشمز باشلو باشمزه حکرته الشمشز اتحاد
 اولنان اصول اداره یه نظراً بز لرك بورالرده اقامتمز مناسب اولیه جق بنده اولاد
 و عیالمله حلبه کیدوبده عمرمی اوراده کچیرمک ایسترم فقط اوراسی بریوک شهردر
 حساب ایدم اوراده کچنمک ایچون شهریه طقوز یوز غروشه محتاج اوله جقم بونی
 تخصیص ایدیکیز بی ده حلبه کوندریکیز)

همان بیورلدین تحریر و تمهیر ایله کندوسنه تسلیم اولندوق ایستدیکک کون
 حلبه کیم دیو عودته رخصت ویرلدکده احمد بك (بن) ارتق اکبازه عودت ایله هم
 بی بورادن حلبه کوندریکیز) دیمکه در حال لزومی قدر نقلیه حیواناتی تهیه ایدیلوب
 و اولاد و عیالی اکباردن کتور دیلوب جهه سی حلبه کوندرلدیلر .

چرچیل ناحیه سنده اولان بیانخیلر بو ائنده چیل باوروسی کی اطرافنه طاغلمش
 و جمع اشقیا اولان قریه لر اهالیسی اولاشلی طاغلبنه چقمش اولدوقرندن بو قریه لر
 احراق بالنار ایداش و اضرافده قالان کچوک قریه لر اهالیسی یولرنده قالمغله انلرک
 نفوسی تحریر ابلیدر . و کرکوتلی ناحیه سنک وبعده بیکر کرد ناحیه لرینک تحریر
 نوسلری ختام بوردقه اصلاحیه ده قرعه لری چکلمشدر .

الحاصل کاور داناغنک جانب شرقیسنده واقع کرد ناحیه لری هب تحت انضباطه
 الندی لکن دلی خلیل قیا باشی قریه سنده کین کیر احتفا اولمغله انی بو حالده براقق
 جاؤ دکر ایدی ، و انک اوزرینه وارلسه مرسل زاده مصطفی بك ایله معینده بولنان
 اکبازی علی بك - - انک علیهنده اعمال اولنق لازم کلوب بوایسه جای دقت برکیفیت
 ایدی زرا مصطفی بکک همشیره سی دلی خذلاک زوجه سی و دلی خلیلک همشیره سی

علی بکک زوجہ سی ایدی . ومصطفی بکہ امنیتم وار ایسہدہ علی بکدن امین دکل ایدک . حالبوکہ قیا باشنک مداخل و مخارجنی اک اعلی بیلن علی بک ایدی . ودلی خلیک فنی گوشہ وبوجاقده اولدینغی انجق او بیله بیلوردی . بناء علی ذلک کیجہدن اوچ طاہور ترتیب و قبل الفجر قیاباشنہ سوق اولنوب علی بکک دخی برمعتاد قوللری باغلانہرق قلاوزلق ایشندہ استخدام ایله عسا کر شاہانہ علی الصباح قیاباشنی باصدیلر و ہلہ اولادہ دلی خلیک بانندہ کی اشقیقا مقاومتہ جرأت ایلمشر ایسہدہ عسا کر شاہانہ نک هجوم واقتحام دلیرانہ لرینہ قارشو طورہ میوب صارپ یوللردن اولاشلی طاغیرینہ صعود ایلمشر او صرہدہ دلی خلیل دخی یالین ایاق باشی قباق اولاشلی طاغیرینہ چیقوب ددہ بک کچی علی بکر اوغلنہ دخیل دوشمشدر . لکن حیوانلری واغرلنی واشیای سائرہ سی عسکر طرفندن اغتنام اولمشدر . دلی خلیک والہہ سی اول حوالینک بیوک بلیہ سی اولان خاتم ایکی قضا قورشونیلہ لندن و قالچہ سندن یارہ لشمشر . مصطفی بکک ہمشیرہ سی ودلی خلیک زوجہ سی اولان خاتم ایسہ قوجہ سنک اک اعلی آتہ سوار اولہرق طاغہ صاروب براز یول آلمش ایسہدہ حیوان کیدہ میہ جک صارپ یرلرہ وارنجہ بیچارہ آت دوشوب یوارلان دینغی صرہدہ خاتم ایاق لرینی اوزنکیدن چیناروب طاشارہ طوتنہرق و ککلک کچی سکہ رک اولاشلی طاغیرینہ صعود ایله قوجہ سنہ ایرشمشر .

شو حالہ کورہ ارتق اکبازلی علی بکک معیتدہ بولنسی مناسب اولیہ جفندن محض اولان بشیوز غروش معاشنی ادرنہدہ المق اوزرہ اورایہ کوندرلمسی چون درسعادتہ کوندرلدی .

متعاقباً اولاشلی آغالرندن قرہ یکیت اوغلی وقیاق اوغلی و چند اوغلی فرقا اصلاحیہ کلوب عرض مطاوعت ایلدیلر قرہ یکیت اوغلی قدیر آغانک قریہ سی اصلاحیہ قریب اولدینندن اصلاحیہدہ برخانہ یاقمق و ہفتہدہ ایکی کون کلوب کیتمک اوزرہ اصلاحیہ سنجانغی مجلسی اعضا لغنہ تعیین اولندی .

هدف حرکتیمز اولاشلی آغالری ایکن اوچی بو وجہلہ عرض انقیاد ایلمش اولدقلرندن یالکنز علی بکر اوغلی علی آغا قالدی واکرچہ علی اغانک سائرلرہ نسبتلہ اہون و اولدقجہ سوز اکلار بر آدم اولدینغی خبر ویریلوردی . لکن ایکی دخیلینی

فدا ایدوبده مطاوعت ایلمسی قبائل و عشائرک عاداتنه مغایر اولدیغندن انی جبراً تحت اطاعتنه آلمقدن غیر یی چاره یوق ایدی . قالدی که قره ییکیت و قیباق و چند اوغللری ده مؤلفه القلوبدن اولوب علی بکر اوغلی اله کچمه دجه آنلرک دوام اطاعتلرینه ده تمامیله امنیت اولنه مازدی .

اصلاحیه دن همان یارپوزه چیقیلوبده اورادن علی بکر اوغلی یوردی اوزرینه حرکت اولتوق اکرچه ایجاب حاله موافق کوریل یوردی . لکن بو یول پک صارپ اولوب انی بوجه بالا مصرلی ابراهیم پاشا و صکرده ده چتال باش مصطفی پاشا تجربه ایتمش اولدقلرینه و بولانیق قضاسنه چیقیلوبده اورادن طاغ صرتیله طریق اسهل ارامق موافق حال و مصلحت اوله جفته مبنی اوائل ربیع اولده اصلاحیه موقضتک محافظه سی ایچون بر طابور عساکر نظامیه براغیلررق فرقه اصلاحیه ایله حرکت و خان اغزی قریه سی طریقیله اصلاحیه به بش ساعت مسافده واقع و بولانیق قضاسنه تابع و قیباق اوغلی ناحیه سنه متصل اولان کیشنز نام قریه به چیقیلوب نصب خیام اقامت اولندی . و همان قره ییکیت و چند اوغللری ناحیه لرنده دخی قرعه کشیده اولتوق اوزره تحریر نفوسلرینه باشلاندى .

اول حوالی اهاالیسنک عسکردن کوزلری ییلمش اولدینی جهته کیشنز قریه سی اهاالیسی فرقه اصلاحیه نک حرکتنی طویدقلری کیبی قریه لرین ترک ایله طاغله چیمشدر و خرمنلرین یوز اوستنه براقشدر اورایه وارلدینی کیبی خرمنلرک محافظه سی ایچون اطرافنه قره غوللر ترتیب اولندی . بولانیق قضاسنک هم خطیبی هم مفتیسی اولان قنبر افندی بعض وجوه و مختاران ایله بورایه کلدکده کیشنز اهاالیسنک کلوب خرمنلرینی دوکلری و ذخیره لرینی آلوب صامانلرینی بزه صامه لری ایچون انک واسطه سیله خبر کوندرلدى . کویلیز ایسه امثال سابقه سنه قیاساً اردو ایچنده قالان خرمنلردن خیر قالماق فکرینه ذاهب و خرمنلردن مایوس اولمشلر ایتمش بو خبر اوزرینه قریه لرک جوارنده کی تپه لر اوزرینه اینوب اوزاقدن خرمنلرینک خالی اوزره طوردیغنی کورنجه مع التعجب یواش یواش یا ناشوب خرمنلرینی دوکلرله و ذخیره لرینی در آنبار ایدوب صمانلرینی بزه ووردیلر . صمانک پاره سی وریله جک اولدقده بو تاریخه قدر قضالرنده پاره ایله صمان صایتلیدیغنک امثالی اولدیغندن پاره آلامق ایستدکلرنده هه منی و شه قه لئک بساغ اولدنر کنده لسنه لدی الافاده صمانک فستای اولدیغندن

شاشیروب قالدیلر همان خاصه و اصلاحیه طرفلرنده فرقهجه صہانک معلوم و معین اولان فیاتنه قیاساً کیشنز قریہسی صہانلرینک دخی اٹمانی کندولرینہ تأدیہ قیلندی . بولانیق قضا سندنہ یاغ و صوغان کچی شیلر پارہ ایله آلتوب صائلدیقندن اومثالوارزاق حقندنہ دخی بو وجہله معاملہ اولندی . کاور طاعی اہالیسنک بورادہ دخی فرقہ اصلاحیہدن کوردکلری آثار عدالت و حقانیتہ نظر تعجب ایله باقوب حکومتہ آلمقہ باشلادیلر . بوضورتہ یولو اغارک نفوذ متغلبانہ لرینہ کوندن کونہ ضعف کلکدہ ایدی .

بروقدنبرو بولانیق قضاسی مرکزیندہ بولنان طابور بوکرہ کیشنز قریہسنہ ورود ایله فرقہ اصلاحیہ ملحق اولدی . و بو ائنادہ ارسلان پاشا ایکوز بوقدر تفنک انداز کرجی وچرکس اتولوری و الشکردلی محمدک اوچیوز قدر قارغیلی کرد سواریسیلہ فرقہ اصلاحیہ وصول بولدیلر . جملہسی کزیدہ و مضبوط و قوماندانلرینک امرلرینہ مطیع عسکرلر ایدیلر ہلہ کورد اتولورینک چوغی عشرت بکلری و اغاری اولوب فخری اولہرق عشرت لرندن بر مقدار اتلو ایله محمد بکک یانہ قاتمشلر ایدی . حتی درسیم طاعی اغارلندن مشہور محمود اغا دخی برطاقم آتولوریلہ کلش ایدی . انک غرضی ایسہ شاید فرقہ اصلاحیہ درسیم طرفنہ کیدرسہ احوالہ کسب و قوف ایتمکدن عبارت ایش . مع مافیہ پیادہ لک پک کوچلک ایله چیقہ بیلدکلری طاغ تپہ لرنده محمود اغانک اون بش یکرمی قدر شیشخانہ تفنکلی آتولوریلہ کورنمسی کاور طاعی اشقیاسنہ دہشت ویرمکدہ ایدی .

بولانیقندن طاغ صیرتیلہ طوغری علی بکر اوغلی یوردینہ حرکت متصور ایکن بورادن اورایہ کیدن یولک دخی یارپوزہ اوغرادینی و کاور طاغنک چقور اوہ جہتندہ واقع و پیاس سنجاغنہ تابع فی ناحیہسی اولوب بورادن علی بکر اوغلی یوردینہ چیقلمق دہا سہولتلی اولدینی و عصات ہر طرفدن تضییق اولمش ایکن بعض احتیاجات ضروریہ لرینی قبی ناحیہ سندن آلدق لری او کرنش اولدیفندن بو ناحیہ طوتلوبدہ اورادن عصات اوزرینہ کیدمک اوزرہ قرار ویرلدی .

چقور اوہ طرفنہ کیلیدیکی کبی کافہ معاملاتمز اطنہ ایالتیہ اولہ جفندن حلب و مرعش ایله قطع حساب اولمق اوزرہ ہر طرفہ اعلان کیفیت اولندی . اصحاب مطلوب کیشنز قریہسنہ کلوب الہ جقلری نقداً و حوالہ تسویہ قیلندی . حلب

و مرعش طریقاریله ایلشکلریمز کسیلدی و خط رجتمزك محافظه سنه مأمور اولان مرسل زاده مصطفی بك ايله حلب ضبطیه لری اعاده اولندیگی کبی حلب موقعی فریقی سید پاشا دخی حلبه اعاده اولنوب فقط میرلوا یاور و حسنی پاشا معیتده آلیقونلدی . .

یاور پاشا و ارکان حریبه رئیس حسین بك بر بلوک سواری و ایکی طاور پیاده ایله کشف ایچون قی ناحیه سنه کوندرلدی . میرلوا حسن پاشا دخی پیاسدن اورایه کلوب برلکده لدی المعاینه قی ناحیه سنک اردوگاه اتخازی تنسب ایدنش اولدیغندن ربیع اولک یکر می بشنجی کونی فرقه اصلاحیه ایله کیشنز قریه سنندن حرکت ایله چقور اوه جهته اینلوب کیجه کیشنز قریه سنه درت ساعت مسافه می اولان باج بورنی نام موقعه بیتوت و فرداسی حاجی عثمانلی قریه سنک اوست طرفنده نصب خیام ایله موجود معتمز اولان طفوز طاور پیاده تعین ایدلدی

شوبله که حاجی عثمانلی قریه سی کور طانغک بروادیسده براوجی چقور اوه و مک کنارنده اولوب بر اوچده یوقارو طوعری اوزانمش طولانی بر قریه اولغله اوست طرفنده و جانب جنوب غریبسنده کی صیرت اوزرنده چادر لر قوریلوب اطرافنده کی تپه لر طوتلدی و بوراده برقه انشاسنه باشلاندى، سواری الای ایله کرجی و چرکس و کرد سواری لری دخی قریه نك الت طرفنده و چقور اوه دن معدود اولان دوزلکده یرلشدیرلدی و هدف حرکتمز اولان علی بکر اوغلی هر طرفدن ابلوقه ایدنش ایدی . بالاده عرض اولندیگی اوزره ارکان حریبه بیکباشیلرندن سر یاور چا کری اولان حسین حسنی بك قورت اسماعیل پاشا یانه کیدوب کلورکن عفو عمومی بیاننامه لری نشر ایتدیگی صره ده علما و عشیرت کتخذالریله کوروشه رك افکار عامه یی خیلیدن خیلی جلب و تألیف اتمش اولدیغندن قوزانده افکار عمومیه ایکی یه منقسم اولنوب بر قسمی کافی السابوق قوزان اوغله تعیت و دیگر قسمی فرقه اصلاحیه یه عرض مطاوعت فکرنده بولنش اولدقارینه بناء قوزانک ایلو کلنلرندن بعضی لری فرقه اصلاحیه یه کلوب کیتمه ک باشلامش ایدی .

حتی قوزان شرقی اغاسی یوسف اغانک برادری حاجی بك ايله قوزانک اک بیوک قصبه سی اولان خاچین مفتیسی محمد افندی و قوزان شرقی نك ایلو کلنلرندن بعضی لری فرقه اصلاحیه یه مطاوعت سبب سلامت و سعادت اوله جغنی یوسف اغایه

اخطار ایله نصیحت ایلدکلرنده مشر اولدیغندن انلرده قورت اسماعیل پاشا یانته واروب اورادن دخی فرقه اصلاحیه کیشنزقریه سنده ایکن کلوب افاده حال ایستکلرنده یوسف اغا عزل ایله حاجی بك قوزان شرقی مدیری نصب ایلمش ویوزنفر ضبطیه یازمق اوزره کندوسنه بیورلدی ویرلمش ای دوکندن حاجی بك رفیق ایله برلکده مغاره ناحیه سنه وارنج اسماعیل پاشا انک یانته بر مقدار سواری ترفیق ایله خاچینه کوندرمکه قصبه وجوار قریه لر اهاالیسی بالاجتماع حاجی بکک بیورلدیسی اوقتوب او دخی اجرای مأموریته باشلامش و بونک اوزرینه اسماعیل پاشا دخی مفرزه ایله قوزان شرقیه کیروب خاچینه بر ساعت مسافه سی اولان روم کوز اوه سنده نصب خیام ارام ایلمشدر .

بو حاجی بك ایله برابر قوزانه منسوب اولان ترکان عشیرت لرندن افشار عشیرتی بکی متوفی چرکس بك زاده حاجی بك دخی برلکده فرقه اصلاحیه به کلرک حکومت محلیه دن شکایت ایلمشیدی .

شویله که بالاده عرض اولندیغی اوزره کوچیه عشیرت لر ایام صیفده یایلایه کیدوب کلورلر ایکن کچدکلری برلری تخریب ایستکلرندن بشقه غصب و نهب اموال ایله اهاالی مطیمه به پک زیاده ایصال خسار ایده کلدکلرندن و اکثرینک یایلاقلری اوزون یایلا اولوب اوراده ایسه مهاجرین چرا کسه اسکان اولنق دولتجه مقرر اولدیغندن عشیرت لر بوسنه فرقه اصلاحیه جه یایلایه کیتمکدن منع اولمشلر اییدی . افشار عشیرتی دخی چقور اوده قیشله بوب یازین اوزون یایلایه کیتمکده ایکن اوراده کی یایلاقلرینه مهاجرین چرا کسه اسکانه باشلامش اولدیغندن حاجی بك کندی عشیرتی اورایه جوار اولان صاریز اراضیسنده اسکانه تشبث ایدوب بوده فرقه اصلاحیه جه اتخا ذ اولونان اصوله موافق اولدیغنه مبنی حکومت محلیه جه کندوسنه تسهیلات کوسترلمک لازم ایکن بالعکس تصعبیات کوسترلمش ای دوکندن بروجه بالا فرقه اصلاحیه به کلوب عرضحال ویرمکه کندوسی ایستر ایسه او طرفده و ایستر ایسه چقور اوده کی قیشلاق یوردنده اسکان ایتمک اوزره مخیر قیلندقدمه یایلا جهتی ترجیح ایتمکه صاریز اراضیسنک افشار عشیرته تخصیصیه اسکانلری خصوصنده تسهیلات کوسترلمک اوزره لازم کلنلره تحریرات یازلدی و بوبابده معاونت اولنق اوزره کیفیت قورت اسماعیل پاشایه دخی اشعار ایلدی .

جرید عشیرتی تجرلی به نسبتله ضررسز بر خلق اولوب قریم محاربه‌سنده
درسه‌دته کلوب اردویه کیتمش اولان قره فاطمه دخی بو عشیرتک بر اویماغنک
کتخداسی ایدی فرقه اصلاحیه کلدی کندوسنه اکرام ایدلدی واسکان ایچون
یر کوسترلدی .

تجرلی بوی بکیسی سلیمان اغا دخی ضررسز بر آدم ایدی لکن بر اویماغنک
کتخداسی اولان قره کهایا بک شیر بر آدم اولوب و تجرلی عشیرتی ایچنده تنفذ
ایدرك تجرلی اشقیاسنی باشنه طوپلایوب هر طرفه ایصال مضرت ایلردی وبروجه‌بالا
بوسنه هپ عشیرتله یایلایه کیتمکدن منع اولندقلری حالدده قره کتخدایا کندی
اویماغیله چقور اووده هارونیه نام اورمانلر ایچنده کی قیشلاق محلندن بولانیق
قضاسنه حیقوق زورلایه‌رق اوزون یایلایه کیتمک اوزره هارونیه‌دن حرکت
ایلدیکنده وریلن امر اوزرینه بولانیقده کی طابور ان‌اوروب کیرو اعاده وبرخیلی
حیوانلرینی اغتنام ایتمشیدی . بروجه‌بالا کشف ایچون کیشزدن قی ناحیه‌سینه کیدن
یاور پاشا و ارکان حرب ریئسی حسین بک دخی اثنای راهده بر مقدار تجرلی
سواریسنه تصادف ایله چارپشدقلرنده بر سواری ملازمی وبر چاوش وایکی نفر
یارلنمش ایسه‌ده تجرلولردن دخی اون بش قدری مقتول ومجروح اولمش وبر قاجی
حیا اله کیرلش وبرخیلی حیوانلری اغتنام ایدلش ایدی .

تجرلی وجرید بوی بکیلری وکتخدالری فرقه اصلاحیه حاجی عثمانلی قریه‌سنده
ایکن کلوب کیدرلر وکندولرینه عائد اولان ایشلری رؤیت وتسویه ایدرلر ایدی
فقط تجرلینک اک بیوک واک مضر اویماغنک کتخداسی اولان مرقوم قره کتخدا
حرصنه تابع اولمغله کلوب کورشمدهی حالبوکه بر قاج دفعه اوریلوب بیوک و کچوک
خیلی حیوانلری اله کیمکه محافظه اولنیوردی و کلوب حیوانلرینی آلمسی ایچون
کندوسنه خبر کوندرلش وتأمینات ویرلش ایسه‌ده جنایات سابقه‌سی چوق اولدیغندن
کله‌میوب شوراده بوراده طولاشیوردی .

تجرلی بوی بکیسی سلیمان اغا تحف ولا‌بابلی بر آدم اولوب برکون جلب ایله قره
کهایا اویماغنک حیوانلرینی نه یاپه‌جغز کندوسی کلیور باری اصحابی بولسه‌کده انلره
تسلیم ایتسه‌ک دیدم . مکر اول کون سلیمان اغانک بر کدری اولمغله حدتلیجه ایش
دیدکی (افندیم نیچون بویله اولیه‌جق شیلری اعظام ایدیورسکز بو حیوانلرک قنی

صاحبلىرىنى صوربورسكز بونلردن تجرلىلر اللرنده يىلانمش حيوان يوقدر شوندىن بوندىن اخذ وغصب اولنمش ماللردر اصل صاحبلىرىنى اللهدن بشقه كيم بيلور شمىدى عسكرك اله كچدى انلك اولق لازم كلور فقط مادام كه بوقدر مراق ايدبورسكز ويركو بقايامزه محسوب ايدرك پكده احسانه مستحق اولميان تجرلى عشرتنه برايبلك ايدهبيلورسكز) سليمان اغانك ديدىكى كې ياپدق حيوانلرى صادق اثماتى تجرلى بقاياسنه محسوب ايتدك .

سليمان اغانك اوكونىكى حدتنه كلنجه مكر تجرلى عشرتنده قارىلر قوجهلرئى بوشامق عادت ايمش شويله كه قارى قوجهسنه بن اندن محظوظدكل ديوخبر كوندردىكى كې اندن بوش اولورمش قوجهسى ده عشرته اعلان ايدوب كندوسنى بيكن برقارى وارمى ديو سوال ايتديررمش وبرقارى چيقوبده بن انى بكنورم ديرسه انلكه تروج ايدرمش اول كون سليمان اغايرده قارىسى اول وجهله بوشامش اولديغندن طولايى كدرى وار ايمش .

ممالك دولتعليه ممالك سائره بكنزه مز برايلت ديكر ايااته بلكه برسنجاق ديكر سنجاغه اويماز انكچون دولتجه موضوع اولان اصول وقاعدهلر هر يرده مطرد اجرا اولنه ميور ور والى يامتصرف واردئى يرده لا اقل برسنه اوتوروبده اهايسنك اطوار وافكارئى اوكره نجهيه قدر ايل اليه قوش طومغه مجبور اوليور .

قى ناحيهسى اهايلئى كچوك على ارضائى رينه تابع ايسهده بوراده على بكر اوغلنكده نفوذى جارى اولغله على بكر اوغلنه ودخيل اولان دده بكه مائل اولدقلى دركار ايسهده اردوكاهمز انلك اوستنده اولديغندن ظاهرا اطاعته مجبور ايديلر وبوراسى بولانيق قضاينه نسبتله دكزه دهاقريب ايسهده برطرفله اختلاطلى واخذ واعطالرى اولديغندن اهايلسى حال وحشت ويداوتده اولوب مدار نعيشلرى حيوانات واراضى محصولنه منحصر اولهرق پيسارنده ياره معاملهسى يوق ايدى . هله حه حقدى ياره ندر بيلمزلردى . مع مافيه ايجارنده صارى كله وارسلان قورت اغا كې سوز اكلاز كتخذالر وار ايدى . واطنه دن فرقه اصلاحيه پك چوق اصناف كلوب كيتمكه وهرشى كتوروب صاتمغه باشلا دقلى كې كويليلر حتى ياره نك يوزنى كورمه مش اولان چوجقلىر بيه ياره نك قدرئى اوكره قديلر مختارلك چوجقلىرئى بخشش ووروب

شورایہ بورایہ تحریرات مهمہ کوندرر وبارہ ایلہ ساعیلک ایتدیرر اولدق و طوغریسی
چوق ایشمزہ یارادیلر .

حاجی عثمانلی قریہسی سرکز اولق اوزرہ قبی ناحیہسی بر قضا اتخاذ و عثمانیہ
تسمیہ قیلندی . واولاشلیدن قرہ یکیت اوغلی ناحیہسی اصلاحیہ قضا سنہ و قیاق
اوغلی ناحیہسی بولانیق قضا سنہ ربط اولندیغی کبی چند اوغلی ناحیہسی دخی
عثمانیہ پک قریب اولدیغندن اورایہ ربط اولندی . و حاجی عثمانلی قریہ سنندن
ارسلان قورت اغا واقیار قریہسی کتخداسی واولاشلیدن چند اوغلی عثمانیہ قضاسی
مجلسی اعضا لغنه تعیین و تخرلی مدیر لکی عنوانیله باج بورنی محافظه سنہ مأمور اولان
تخرلی رستم اغا عثمانیہده بولندیقجه مجلسه داخل اولق اوزرہ اعضادن اعتبار وهب
مجلس اعضا لرینه معاشره تخصیص ایدلدی .

بو اثناده قارص ذوالقدریہ قضا سنہ تابع و قوزان حدودنده واقع سونناس ناحیہسی
بکی کوکولی اوغلی احمد و سونناس ناحیہ سنہ مربوط یاغ باصان ناحیہسی کتخداسی
کنج و غلان اوغلی احمد اغا کبی بعض ذوات فرقه اصلاحیہ کلوب کیتمکه و اطراف
واکنافده بولنان عشاثر بک و اغالی عرض مطاوعته باشلادیلر . بروجہ بالا اولجه
قورت اسماعیل پاشا دخی قوزان شرقیہ کیرمش ایدی لکن اصل قوت قوزان
غریبده اولمغله ارتق اورایہ وارمق زمانی کلدیسهده اول امرده جمع اشقیا اولان علی
بکر اوغلی ناحیہ سنہده اوروب اوراده کی جمعیت شقاوتی طاغتمق اهم و انزم ایدی .
درویش پاشانک طاغ محاربه لرینده مهارتی مسلم اولوب انحق یوللری و شکل
وهیتی مجهول و اورمانلق و غایت درین و طار و ادیلری حاوی و پک زیاده عارضه لی
اولان کاور طاغنده حرکت عسکریه نک نه مرتبه مشکل اولدیغی دخی بیانه محتاج دکلدرد .
درویش پاشا یدی طابور سجدی و ضعیف لرینی اردو کاهده براغوب لرینہ صاغلام
نفرات آلدی جمله سنہ چاریق کیدردی و چاطه رینہ برر طغارجیق و بردی . والی
کونلک پکیماتلری ایله مقدار کافی جبه خانہ لرینی بو طغارجیق لره قویدردی و او طاغ لره
آت ایشلمدیکندن بیکباشیلره قدر امرا و ضابطانی استرلره بندردی و بش قطعه
طاغ طوپلرینک ایکسینی اردو کاهده براغوب اوچ قطعه سنی و برهاونی استرلره یوکلدوب
حرکتہ مهیا اولدیغی صرہده آرسلان پاشانک آتلولریده حرب ایتمک اوزرہ طاغہ
چیمق ایستدیلر بو طاغ لره آت ایشلمز و سزک آتلر کزه طاغده اربہ بوله میز دیدیکمده

بز سزدن ارپہ ایستیمز طاغده حیوانلرمزی اغاج پیراقلری ایله بسلرز ویهجک
ولهماز ایسهک اتلرمزی کسوب تغدی ایدرز دیدیلر اوپله ایسه الله سلامت
ویرسون دیدم .

بناء علیہ ربیع الاولک غره سی و آغستوسک اون ایکنجی پنچشنبه کونی آرسلان
پاشا ایکویوز قرق نفر انداز کرچی و چرکس سواریلری ایله مقدمه الجیش اوله رق
طاغه صاردی . درویش پاشا دخی سالف الذکر سبکار فرقه ایله حرکت ایلدی .
عزیه یعنی پیاس سنجانغی خاندانندن کچوک علی اوغللرینک خصمی اولان امام بک
ایکیوز نفر پیاسلی پیاده عساکر موظفه و قبی ناحیه سی اها ایسنندن چند و قیاق
و قره یکیت اوغللری دخی برقاچ یوز اولاشلی ششخانه لیلر ایله برلکده حرکت
ایلدیلر . واکرچه بونلر مؤلفه القلوبدن اولوب کرکی کبی کندیلرینه امنیت اولنهماز
ایسده آنلرک اشقیایه قارشاملری بزجه بیوک فائده ایدی . زیرا آنلر عصات ایله
برلشسلر تجرلی اشقیاسنک و اطرافده طولاشان برچوق شقاوت پیشه لرک دخی
طاغه حقیقه جقلری و بو صورتله ایشک آغیرلاشه جنی درکار ایدی .

قوللری قوماندان وکالتیله اردو کاهده قالدیم . فقط سفر بر اولان عسکری
تشییع ایچون آلتی بلوک پیاده آلهرق ارقلرندن حرکت ایلوب کنج اوغلان اوغلی
احمد اغایی ده برلکده کوتوردم . ذروه جباله قدر چیقوب قارشومزده کی علی بکر
بایلاسی اوزرنده جمعیت اشقییا کوردی . فقط آره مزده بک درین وادیلر وارایدی .
درویش پاشا طار بریول اوزرنده عسکری صره سیله دیزوب سوق ایتدی .
کندوسی ده ایلری کیتدی . و برششخانه لی طوپک اغزینی یوقارویه قالدیروب آتدردی
دانه واروب جمعیت اشقیانک اورته سنده پاتلادی . بردن توز قالدردی جمعیت اشقییا
طاغدی بصرده اول وادینک اشاغیسنندن یوقارو طوغری سکر دوب کیدن برخیلی
سواری کوردی . تجرلی اشقیاسنندن بر طاقنک جمعیت اشقیایه التحاق ایچون طاغه
حقیقه جقلر ایش دیو ایشتمش اولدیغمدن بو سوارینک تجرلی سواریسی اولدیغنه
ذاهب اولدم . دورینلر ایله نظر ایدرکن کنج اوغلان اوغلی دورینندن اعلی کورن
کوزلریله کوروب ارسلان پاشا سواریسی اولدیغنی خیر ویردی . دورینلر مزده انی
تصدیق ایتدی . ارسلان پاشا سواریسی اشاغیدن یوقارویه سکر دوب هنوز کله نک
قالدردینی توز بوتون بوتون زائل اولدن اوراه واریدیلر و اشقییا اوزرینه هجوم

ایتدیله . اشقیا صارپ طاغلردن اشاغی طوغری فراره یوز طوتدقلرنده انلر دخی شاهین کبی سوزیلوب تعقیب ایتدیله و کوزمزدن نهان اولوب کیتدیله . مکر آت ایشله مزیرلره واردقلری کبی پیاده اوله رق قلیچ و قامه لرینی چکوب اشقیایه پریشان ایتشلر .

ایشته او صرهدده علی بکر اوغلی علی آغذک کچوک برادری اولوب دلی فقی (فقیه) دیو معروف اولان احمد اغا برقاچ یوز اشقیایله عسکرک صاغ جناخنده کی وادیدن چیقوب دمدر طابورینک اوزرینه آتس ایتدی . طابورک اوکندن کیدن جراح بیکباشیبی ایله بش آلتی نفر اوریلوب دوشدی . طابورک بیکباشیبی زدیف افندی (مؤخرأ سرعسکراولان ردیف باشا) بو هجوم ناکهانی اوزرینه نه یاپه جغنی شاشیرمقله اللزیتی اویشدیروب بل بلن باقینوردی . بز دمدر طابورینه یاقین ایدک لکن آره مزده حرکته مانع اوله جق عارضه لر وارایدی . چونکه کاور طاغنده برچوق طار و درین وادیلر وارکه ایکی جبلک ذروه سننده کیلر بربرینک سسلرینی ایشیدر ویکدیگره اوزاقدن مرامنی ا کلاده بیلور ایکن برجلدن دیکرینه بر ساعتده واریلماز دلی فقی ایله ارامزده بویله عارضه لر وار ایدی . ردیف افندی طابورینه یاریم صاغ قوماندسی ووروبده براتس ایتسه اشقیانک پریشان اوله جقلری درکار ایدی لکن کندوسی شاشردی عسکر ایسه امره منتظر طور یوردی دلی فقیده ایستدیکنی نشان ایدوب اوریوردی . درحال میرالای ابراهیم بک ایلرودن ایکی بلوک ششخانه جی ابله کیرویه کلوب اشقیا اوزرینه اتس ایتمه باشلانجه اشقیا بوزلدی اشاغی طوغری قاجدی لکن ابراهیم بک ششخانه قورشونلری منزلندن قورتلنجه یه قدر چوق زده لندیله . بو اراده درویش باشا کیرو کلوب یارمولوری اعاده ایتدی . بزده اردوگاهه اینوب آنلری تیمار ایتمه اهتم ایلدک بعضیلری قورتلدیسه ده جراح ایله بعض نفرات فوت اولشلردر .

اول کیجه عثمانیه مختارلرندن بعضیلری چادره کلوب قوللریله کورشدکارنده ارسلان قورت اغا (بو طاغک آرتق ایشی بیتدی . اولاشیلرک انک بویوک فندی اوزرلرینه کلن اوردونک اوکندن صاوشه رق ایجه ایلر و چکدکدن صکره صاغندن سولندن ارقه سندن اوروب شاشیره رق منهزم ایتک صورتیله اولوب مصرلولریده بویولده مغلوب ایتشلر ایدی . بوکون ابراهیم بکک حرکتی بو تدبیری بوزدی آنلر

آرتق بوعسکرہ یا قلاشہ مازلر) دیدی. واقعا طاغولر اولوجہلہ ششخانہ قورشونلرینک طادینی طاتقدن صکرہ عسا کر شاہانہ یہ یا قلاشہ ایدیلر .

قوزاندہ بولنان سر یاور چاکری حسین حسنی بک بروجہ بالا درویش پاشانی تشییع ایچون طاغہ حیقدیغمز کون عودت ایلیہرک قوزان غربی اغاسی احمد اغا (احمد پاشا) نک پدری عمر اغا و سیس مفتیسی محمد افندی و قوزان غربی نک بعض وجوہ و معتبرانی و عشریت کتخدالرندن ایلو کذلری و قوزان شرقی مدیرینک برادری خلیل بک ایلہ برلکدہ عثمانیہ ککشلر ایدی . بروجہ بالا عودت ایلہ اردوکاہہ کلدیکمده انلر ایلہ کورشدم و کندولری ایچون چادر قوردیروب درویش پاشانک عودتنہ قدر مسافرة الیقودم .

قوللری ہر کون اخشام صباح خستہلری و قرہ غوللری و مواقع عسکرہ یی طولاشور و بورادہدہ اختلاس وقت ایلیہرک مسافرلرمن ایلہ کورشور و قوزانہ دائرہ بختلر آچہرق ذہنلرینی دائرہ انقیادہ میل ایتدیہرک ادلہ انقاعیہ ایرادیلہ اوغراشور ایدم . عمر اغا بودور و حرکت چاکری یہ مراق ایدوب سببینی بعض رفقا سنندن لدی انسؤال قوماندان پاشا طاغدہ حرب ایلہ مشغول اولدیغندن شمدی انک ایشنی قاضی عسکر افندی کور یوردیدکرندہ یا مشیر پاشادہ بویلہ ضولاشورمی دیو صورمش . او ہیچ طورماز دیمشلر عمر اغا بوکا تعجب ایتدکدہ عسکرہ بویلہ باقلورسہ ایش کورر دیمشلر کنج اوغلان اوغلی اورادہ بولنغلہ اغام اردو بویلہ اولمی بوتدییرلرہ بو ترتیب لرہ نہ بو طاغلر طیانور نہ بزم طاغلرمن قارشو طورہ بیلور دیدکدہ عمر اغا اوت طوغریسین . بندہ تسلیم اولمق اوزرہ اوغلم احمد اغایہ نصیحت ایلیہرک . دکلمنر ایسہ انی ترک ایلہ اردویہ کلوب کندی حسابہ اطاعت ایلیہرک دیمش .

عمر اغا ملایم و سوز آکلار بر آدم ایدی اما اوغلی احمد اغا چتین و خشین بر آدم اولدیغندن نصیحت قبول ایدہرک مشکوک ایدی . فقط اسکندرونندن بورایہ قدر ابراز اولنان آثار عدالت و حقانیتدن اہالی فوق العادہ ممنون و متشکر اولوب پادشاہ بزہ بر کتاب ایلہ بر قلیچ کوندرمش کتابہ اویانلرہ ہیچ اویمانلرہ قلیچ دیویبورمش سوزی ہر طرفدہ شایع اولوب حسین بکدہ بودرلو شایہلری قوزانک اوتہ طرفہ قدر ایصال ایتمش اولدیغندن احمد اغا اگر مقاومتہ قیام ایدرسہ کندوسنک عسا کر خاصہ سی مقامندہ اولان بر قاج یوزاتباعی ایلہ قالہ جنفی سیاق احوالدن اکلاشیلیوردی .

ملت اسلامیه نه بویوک ملتدر کرک نظامیه کرک باشی بوزوق عسا کر اسلامیه نه کوزل عسکردر وقت حضرده معاش و تعیین ایچون صیزلانسه لر بيله سفربر اولدقلری حالدہ قوری اکمکه قناعت ایدر لر . بزم باشی بوزوقلر من تعیینات آز ویرلدی یاخود وقتيله ویرلمدی دیه ازعاجاتدن خالی اولمالزردی . بوکره اولاشلی طاغیرینه چیقانلر کبی چقور اوہ جهتنده قالان سواریلر دخی پکسپاددن بشقه برشی ایسته من اولدیلر . قوللرینه ده غیرت کلوب الدن کلدیکی قدر انلره ما کولات و سائر لوازمات کوندرمکهده تجویز قصور ایتمدم .

درویش پاشا علی بکر اوغلی یوردینه کیروب ایلری طوغرو حرکت ایلمکده اولدینی حالدہ جوار قری و قضالردن ترتیب اولنان نفیر عام عسکرندن هر کون برر ایکیشر بلوک ترتیب و انلره برابر برر قافله ذخیره و سائرہ سوق ایلردم . بو جهته درویش پاشا فرقه سنک هر کون قوتی تازه لنوردی . قوی ناحیه سی اها لیسنک اطاعتلری پکده صیمی دکل ایسه ده عثمانیه دلیقانلیرندن اچہ ایله جب ایتدی کمز چوجقار واسطه سیله هر کون و بعضاً ایکی دفعه درویش پاشا ایله مخبره و مراسله ایدردک . التونک نه اولدیغنی هنوز اوکرنمش اولان کنجدر بزه پک کوزل خدمت ایلدیلر درویش پاشا اوردوکاهدن طقوز ساعت قدر تباعد ایلدیکی حالدہ مخبره من منقطع اولدی . درویش پاشا کوللی قریه سنه قدر اشقیایی قووالادی اشقیاییتاب اولمش دده بک ایله خلیل امانسز قالمش و بو جهته ایکیسی ده رای و امان دیله یوب درویش پاشا ده رای و امان ویرمکه ایکیسی ده بوب تسلیم اولمشلر .

علی بکر اوغلی علی آغا دخی بنم شمدی به قدر مقاومتم بو ایکی مسافرمک خاطری ایچون ایدی بنده سزه دخالت ایلرم سزایشکزه کیدی کمز بن پوراجه اولان ایلشکلمی تسویه ایتدکدن صکره یانکزه و اریرم دیو درویش پاشایه خبر کوندرمش وقوی سوز ویرمش بویله بر قوری سوزه تمامیه امنیت اولنه ماز ایسه ده عسکر آچقده و بولندقلری طاغیرده صغوق زیاده اولدینی بیانیله درویش پاشا بو خصوصه رای عاجزانهمی استعلام ایتدی . عسکرک یدی سکز کون و کیجه آچیق صاحبیق طاغیرده حرب ایله مشغول اولدقلری جهته چادرلرینه کلوب ده دکلنملری لزومنی و قوزان ایشلرینک اهم اولدیغنی مطالعه ایدرک همان عودت لرینی مناسب کوردم .

انک اوزرینه درویش پاشا عودت ایله اردوکاهه تقرب ایلدکده استقباله جیقدق

دده بك ايله دلی خلیل سلاحلری بللرنده اولدقلری حالده باشیبوزوق سرکردهلری طورنده عسکرله برابر کلیورلردی اثنای محاربهده اله کچن بعض اشقیا دخی اللری باغلو اولدقلری حالده کتوریلورلردی . عساگر شاهانه دخی یوقارودن اشاغه مظفرانه سوزیلهرک کلوب چادرلرنده استراحته واردیلر عساگر شاهانه نك سرعتله وکال انتظام ايله طاغدن ایندکلرینی قوزانلور نظر تعجب واستحسان ايله تماشا ایتدیلر عمر اغا ورفیقلری درویش پاشا ايله کورشدیرلرلر کدن صکره حسین حسنی بك ايله قوزانه اعاده اولندیلر . ایش انجق قوزان غربی اغاسی احمد اعاده قالدی قوزان شرقی اغاسی یوسف اغا اگرچه کورنشده بر طور سرکشانه ايله طور مقده ایدهده یرینه نصب اولنان حاجی بك خاچینده اجرای حکومت ایلکده ایدی مع هذا یوسف اغا دخی احمد اغانک حرکتته منتظر ایدی .

شوحاله کوره ارتق قوزانه عزیزتمز لازمئمالدن کورلدی . واولا کشف ایچون ارکان حربدن احمد مختار بك (احمد مختار پاشا) بر مقدار سوازی ايله ایلرو کوندرلدی . یول اوزرنده قوری اوتلر پک چوق اولدیغندن یول اچق ایچون بعض مواقده کی اوتلری یاقق اوزره بر مقدار عسکر کوندرلسی لزومنی اشعار ایتدکده طقوز طابور پیاده و برالای سوازی نظامیه و برخیل باشیبوزوق اتلوسی وایکی بیکه قریب نقلیه حیواناتی ايله حرکت ایده جک فرقه یه اوتلرک مانع مرور اولسی جمله مزه بعید کورندی مع مافیہ مختار بکک اخطاری وجهله ایلرویه بر مقدار عسکر کوندرلدی و اواسط ربیع الاخرده فرقه اصلاحیه ايله عثمانیه دن حرکت و جهان (جیحان) نهرندن مرور ايله بر کیجه همپته قاهه سی خرابه سی جوارنده و جهان نهری کنارنده و بر کیجه ینه چقور اووده بیتوت قیلندی و مختار بکک اشعاری تصدیق اولندی . اگر اولجه کوندریلن عسکر اوتلری یاقوبده یول آچمش اولسیدی بو اوت دریاسی ایچندن کچمکده چوق مشکلات چکیله جک ایش .

(مابعدی وار)

